



МОНГОЛ УЛСЫН ИХ ХУРЛЫН ГИШҮҮНИЙ
АСУУЛГА

14201 Улаанбаатар хот, Сүхбаатар дүүрэг
Жанжин Д Сүхбаатарын талбай 1, Төрийн ордон
Утас: 26-70-16, Факс: 32-70-16
E-mail: stategreathural@parliament.mn
<http://www.parliament.mn>

2021.09.30 № 31

Асуулга тавих тухай

Монгол Улсын Их Хурлын тухай хуулийн 8 дугаар зүйлийн 8.1.13-т заасны дагуу Улсын Их Хурлын гишүүний бүрэн эрхийнхээ хүрээнд дараах асуулгыг Монголбанкны Ерөнхийлөгч Танд хандан тавьж байна. Үүнд:

1. Төрийн өмчит аж ахуйн нэгжүүдийн дотоодын зах зээл дээр гаргасан төгрөг болон америк долларын бондоос Монголбанк эзэмшиж буй эсэх, болон хэрэв эзэмшиж буй бол дүн, энэ талаар гаргасан тушаал, шийдвэр, цаашид дахин эзэмших эсэх талаар;
2. Валютын ханшид гол нөлөө үзүүлдэг эдийн засгийн суурь үзүүлэлтүүд хангалтгүй байна. Үүнд: Төлбөрийн тэнцэл 2021 оны 6 дугаар сард 54,2 сая америк долларын алдагдалтай (Төлбөрийн тэнцлийн урсгал данс 2021 оны эхний хагас жилийн урьдчилсан гүйцэтгэлээр 934,9 сая америк долларын алдагдалтай гарч, энэ нь өмнөх оны мөн үеэс 52,2 (5,9%) сая америк доллараар өссөн). Засгийн газрын гадаад өр 8,5 тэрбум америк доллар, Монгол банкны гадаад өр 2,2 тэрбум америк доллар, мөнгөний нийлүүлэлт М2-ийн жилийн өсөлт (2020 оны 7 сард 21,5 их наядаас 2021 оны 7 сард 27 их наяд болж) 25,9% огцом нэмэгджээ.
Мөн нийт олгосон зээлийн өрийн үлдэгдэл 19,5 их наяд төгрөг байгаагийн хугацаа хэтэрсэн зээлийн өрийн үлдэгдэл 1,2 их наяд, чанаргүй зээл 2 их наяд төгрөгт хүрч буй нөхцөлд валютын ханшийг тогтвортой байлгах талаар ямар бодлого хэрэгжүүлэхээр төлөвлөж буй талаар;
3. Иргэд сонгогчдын зүгээс Коронавируст халдвар /Ковид-19/-ын цар тахлаас урьдчилан сэргийлэх, тэмцэх, нийгэм, эдийн засагт үзүүлэх сөрөг нөлөөллийг бууруулах тухай хууль батлагдсанаас хойш банкуудын эх үүсвэрийн зардал огцом буурсан боловч зээлийн жигнэсэн дундаж хүү тодорхой хэмжээнд буурахгүй байгаа бөгөөд ялангуяа иргэд, жижиг дунд бизнесүүдэд олгогдож буй зээлийн хүү бодитоор буурахгүй байгаа талаар гомдол санал ихээр ирж байна. Иймээс зээлийн хүүг бууруулах чиглэлээр ямар бодлого арга хэмжээ авах талаар тодорхой тайлбар ирүүлнэ үү;
4. 2021 оны 7 сарын байдлаар банкны салбарын хэмжээнд 7 их наяд төгрөгийн асуудалтай зээл байна. Үүнд, 2 их наяд төгрөгийн чанаргүй зээл, 1,2 их наяд төгрөгийн хугацаа хэтэрсэн зээл, 3,7 их наяд төгрөгийн

цар тахлын нөлөөнд өртсөн зээл байна. Тэгвэл нийт банкуудын хэмжээнд зээлийн үлдэгдэл нь 19,5 их наяд төгрөг байна. Энэ нь банкны зээлээс 100 төгрөг тутмын 35 төгрөг нь эрсдэлтэй гэж ойлгогдохоор байгаа бөгөөд банкны салбар туйлын хүнд байгааг илтгэж байна. Монголбанк энэ асуудлыг хэрхэн шийдвэрлэх, төлөвлөгөө стратеги гаргасан эсэх талаар;

- 2018 оны 01 дүгээр сарын 12-ны өдөр Төв банк /Монголбанк/-ны тухай хуулинд нэмэлт, өөрчлөлт оруулах тухай хуульд Төв банк төсвийн ямар ч үйл ажиллагаанд оролцохгүй байх, ямар нэгэн хэлбэрээр ийм шийдвэр гаргуулахгүй байх зохицуулалтыг оруулсан. Тус хуулийн 27 дугаар зүйлийн 27^{4.6}-д зааснаар "Засгийн газраас аливаа хэлбэрээр Монголбанкинд чиглэл өгөх, хуульд зааснаас бусад асуудлаар гэрээ, хэлцэл байгуулахыг хориглоно", 27^{4.7}-д "Монголбанк энэ хуулийн 15, 18 дугаар зүйлд зааснаас бусад тохиолдолд Засгийн газарт шууд болон шууд бусаар зээл олгох, Засгийн газрын урт, богино хугацаат үнэт цаасыг анхдагч, эсхүл хоёрдогч захаас болон шууд худалдан авахыг хориглоно." гэх мэтээр хэд хэдэн шинэ заалтыг нэмсэн. Мөн Төв банк /Монголбанк/-ны тухай хуулийн 31 дүгээр зүйлийн 31.2-д "Монголбанк Засгийн газраас хараат бус байна, 31.3.-т Засгийн газрын шийдвэр төрийн мөнгөний бодлогод харшилж байвал Монголбанк энэ талаар Засгийн газарт мэдэгдэнэ" зэрэг заалтууд бий. Гэтэл Засгийн газрын 2021 оны 42 дугаар тогтоолоор "Эрүүл мэндээ хамгаалж, эдийн засгаа сэргээх 10 (арван) их наядын цогц төлөвлөгөө"-нд төсвийн шинж чанартай зорилтуудыг Монголбанкаар санхүүжүүлэхээр болсон. Энэ нь Монголбанкны хувьд хууль зөрчиж байгаа эсэх талаар тайлбараа ирүүлнэ үү.

Асуулгын хариуг Монгол Улсын Их Хурлын тухай хуулийн 39 дүгээр зүйлийн 39.3-т заасан хугацаанд бичгээр ирүүлэхийг Танаас хүсье.

УЛСЫН ИХ ХУРЛЫН
ГИШҮҮН



С.ОДОНТУЯА

2021000178